

胡文忠公遺集

胡文忠公遺集卷六十一

長沙鄭敦謹

湘鄉曾國荃

編輯

致曾滌生侍郎

己未正月二十七日

都將軍足疾欲引退深以爲念多與鮑與唐逼太湖而壘如不蠻打不浪戰防援賊據地勢則馬步一萬三千人儘可望勝此三君者智略均短雖督戒之恐不盡從也蔣之純駐宿松之荊橋以杜石牌之窺伺未可移易楚邊均要若并力一路兵勢亦必不活都欲引退則事更難耳水師以三分之一兼步若於樞

陽須濡等處隨機雕剿見利則動因險而壁賊懈賊弱則擊之賊守而不戰則撤入舟中實爲千穩萬當之至且賊船日少江岸先清則陸賊自困彭與楊近日均憚陸師之勞應請尊意函商囑其選將分任也安壘之處有水師相護則萬萬不誤凡兵事只畏三面四面受敵耳有一面可恃則強兵可戰可守有三面可恃則弱兵亦可戰可守又陸兵三千人須月餉一萬五千金若以十分挑三則一萬水師可得精兵三千人三兩六錢者可加一兩四兩餘者可加至五兩餘所增亦不過數千無捷於此者如鈞意以爲可

採尙乞無遺葑菲是幸

復曾侍郎

一月之中音驛不到系念殊深得正月中旬十九號
信知凱章克捷私心大慰所咨三件并尊函卽日送
鄂省矣三日後斟酌再行詳復上駟院派員解馬近
年京旗各員愈貧愈貪吾恐三千馬匹惟得其皮與
其骨耳日昨兵部咨稱申嚴責成地方林翼妄不自
揣以責成追賠復部未審部中何如用不得人法亦
無補殊可慨也丈所籌者遠大一年之後方知丈之
公忠利 國林翼敢不黽勉圖之或奏請或自購商

定卽行速辦都公引疾林翼覺其是真病而舉國均以爲多之驕縱不受約束鬱鬱而爲此也鄂事更少一良將爲之奈何都公仁厚尙有豐鄣故家之遺風近年內大臣之從軍於外者無此質地也林翼前奏迪公之死事蒙以激昂二字見賞祭文則特荷嘉譽如老貢生五六十不中舉忽聞登榜爲之一快林翼本不能文初次學作便爾可造今年方四十八歲若肯發憤尙不爲遲預爲要約一節林翼與丈爭先後不爭彼此也溫公忠骨近日可到當善爲護送敬慰德念另紙以水師三分之一兼習步隊實將來之要

著明年以後可以見効幸主持之黃州蘄水駐營均屬便利希庵體氣漸好志不願歸矣李筱泉大器也敬乞以湖北司道記名請簡謀鄂之忠此爲第

一殊深切懇廿八日發摺請林鏡帆六君子矣

致唐義渠蔣之純兩觀察

讀盡一部念三史古今兵事有戰法無攻法惟近九年之官軍異是賊不欲戰官軍蠻攻賊果欲戰官軍一定要跑此近年官軍之情狀也昔年攻武昌攻梅家洲攻九江均無計不施無醜不備亦可知其大概矣老兄讀書君子久在戎行凡攻堅之事亦無役不

從矣幸乞以此戒約一切如有強兄攻堅者卽錄此
以憑稟報以憑 奏報

復李次青觀察

得初十日手書如獲異寶拳拳以龍公爲念古誼可
師頑鄙興起龍公遺腹計在近旬擬以千金專交湘
舫置田以養其後不得挪爲家用其家頗好客欠累
甚鉅天下惟自己培植自己乃可靠外人及父兄均
不能代謀也老三老四異日當可謀養老四現在營
中近月湖北頗貧以三河桐城之卹銀太鉅迪公功
特大以萬五千賻其喪亦官民之誼也林翼攬利權

而歸之公公私之所費皆出於此迪公之事有謂宜
派州縣公助者林翼恐闢科派之漸尤恐此端一開
影射無窮故仍以取諸公中爲正辦他事類此次第
行之則事乃就理龍公之遲遲未辦蓋有待也且亦
必須另爲謀畫黃金一擲諸少年或不甚惜必致其
遺孤仍無所依倚閱世閱人多矣言之可嘆此林翼
之微意也曾憶水師周清元之喪贖金七八百兩代
爲立繼并代爲斷案又託左湘農代爲置田經營兩
年乃告無罪非僅以出錢爲功果也林翼學問文章
原至淺薄迪公之祭文以夜半起坐悲憤而成應請

滌公改正數十字同林翼之奏刊成一本傳之通都
藏之名山或可藉人以傳文耶過蒙足下與滌公獎
借如老諸生五十年不得中舉忽聞榜發有名爲之
一快至要約一節實難預定彼此林翼與滌公爭先
後耳異日尙有奉託之二三人則季高與足下與霞
仙耳上年以黃金五十兩託人往揚州購書贈希庵
并時勸希庵讀古文亦要約之微意乎平江祠宇以
龍擴黃公居之而耐以三千人亦是盛典應請撰稿
會奏鞋鋪招牌抽帮換底實已做到整舊如新尙難
自信此林翼黃州之軍情也賊不欲戰冒軍饋攻賊

果欲戰官軍欲走此天下官軍之病也林翼必痛戒之滌公早到湖口爲是楚人不宜分幫只此一副本錢耳馬匹一奏將滌函飛遞官相廿八九可復到卽日定稿施行林翼與官相之意只恐上駟院之人好利不好名先蝕銀錢到手則參革亦自怡然三千馬匹惟得其皮與其骨耳事經官手異樣荒唐見慣之後不似早年怒髮衝冠矣溫公忠骨近日可到黃州先軫喪元肖形同殮此劉步瀛一人之力也林翼事無了期而精氣不如四年遠甚公尙未及見耳篠泉大器去年戰案乞滌公特筆畀以大任不可離湖廣

光須以湖北爲緊要天下無督撫保督撫之理嘗謂
今日之司道卽異日之督撫明眼人須著光明著精
神以此告之左公心是其言而力不足也乞堅志毅
力隨事隨時告之滌公必求以此公見惠二年之內
當以吏事託之滌公也奏調林鏡颿林聽孫閻丹初
衛榮光燕建基曾任湖北東
湖縣有循聲童子木城六君子者惟
林鏡颿尙識面餘皆不知蓋訪求而得也林翼欲與
滌公爭賢才之多寡各奔前程爲要

致司道總局

廿六日得廿四來信并繳回都邠之函所論多中肯

要欽感無旣然亦有應商酌者仍詳陳於後又滌帥
今日來咨來函乞公閱逐條示復仍請攜原咨原信
并弟所呈中堂之信敬乞公同趨謁中堂候示滌帥
之不能渡江萬無疑義竊料其心欲依傍彭澤以規
皖南江省主人未必肯放也江省拉人強人則頗有
本領而平日待人則毫無真性情也自謂權術冠時
而不知志士早已冷眼窺破卽如滌公在江省不願
久畱而劉印渠部下有三賢將防湘防鄂援皖之事
均不欲辭惟不願到江西耳又如沈幼丹乃江省道
府之傑士亦使之終日鬱鬱不得其志卽其他可知

矣都公似是眞病其多禮堂跋扈一節似亦不十分確切林翼未到宿松之先頗聞此語到日與都公談三次幾於無話不說亦頗默察其微意其傾慕多禮堂無心流露似非矯飾且三日之久談叙至深都公若有他意不應如此之深沈莫測豈林翼之太淺耶至今思之尙不謂然惟省中所求醫生聞因起課不吉不肖卽行殊不知課之吉凶不如命之前定愚哉人至以術卜生則其得生也不亦微乎都公若須暫假應以馬隊之大半隸多公而以五六百人隸舒公其巴姓寶慶之在荊橋者應歸舒公其都公親隨之

西拉布二百人亦可改歸舒公其黑龍江新到西丹

一二百人卽請速歸舒公

本是舒公遣回另撫之案

合計已五六

百人舒公得之可大戰惟必乞中堂將此事決斷施行計無有妙於此者矣若遲滯不行則有尾大不掉之勢且於軍事有礙舒公卽下駐荆橋亦無不可得

欽差之札卽驕將亦萬無可以放肆之理舒公

如欲上援亦隨時可以檄調此人純良必不誤也切切一條帥欲求中堂奏馬三千匹中堂之意恐牧廠舞弊太大委員沿途剝蝕惟得其皮骨耳林翼之愚不如以萬餘金分三起專弁出口買馬爲穩此信

已復去而滌尙未接到今則專盼鄂中代奏矣滌公一片實心辦事可靠我輩豈忍坐視且所爲者公家之利也何惜此財滌意必欲鄂奏者圍鄂奏則鄂人不能不籌餉耳然添兵馬而裁步營亦可長短相準盈縮相敵弟并不怯也應如何撰奏或出口自購或卽如滌意代奏請察哈爾撥馬之處乞速請中堂施行至於打仗則營兵難用牧馬則官厰難用理財則衙門人難用由來舊矣我輩當戒之一公示欲以都公督希庵進石牌多鮑進太湖希庵之意不畏賊馬并不欲依隨他人惟乞獨當一路專受中堂與林翼

之札耳亦乞勿以撫湘之營交他人差委蓋撫湘雖
摧殘之餘猶較他營爲強且此番更換整飭實有起
色並非欺謾也酌之其蔣道之五千人亦歸林翼與
希庵調遣乃可得力 一滌帥所謂抽幫換底整舊
如新者乃京中舊鞋鋪靴鋪之謊詞也卽如仁營將
勇兵強厯有明效然朱希廣因誤信壞種之言辭去
同知沈定鈞其營務卽日卽於弱撤之則此人異日
或尙可用又如何紹彩之强悍敢戰然近一年來終
日舟中不理營務凡人至不理事則兵無不驕縱者
驕縱之兵無不怯弱者此萬不能不更換之事也須

光敏作戰字入股文天壤閒有子而無奪古今來已
不勝保舉之煩矣 一黃州本屬適中取攜甚便夏
秋六個月陸師千五百人水師左光培一營弟可包
守冬春六個月須兵多乃可守惟其妙處在與麻黃
相近其不妙處在與太湖徇松差遠耳斷水之游公
橋形勢亦好左傍山而右挾湖惟春冬則水涸取攜
不便招新汰舊招引士類延接官吏無城市可依亦
不甚便也弟意不過 多移一步以遵 廷旨且
違禮從戎不能殺賊然覺悚惶而仲然與希庵尙以
黃州爲是姑待初二日再定教營之期 一弟處營

務無人而星槎願做好官若假手一二年必可遂其

俎豆千秋之志

卻不欲補缺發財只求成功使後世百姓說有某某是好官耳私意

亦望其成效以爲鄂吏之矜式耳然營務太無才四

月內不能不調惜其一片作官之苦心不能使之盡

申此則無可如何之事 一造就人才原是君子之

心仁人之術裘令之事現已密訪若以此辦公原可

矜恕特恐自肥者不少耳欲救全人須使之先有忌

憚之心以上縷縷應回明中堂者可速行爲要再者

餉絀月欠七萬八萬奈何奈何如何節用如何預籌

乞公商酌辦再者希庵之父母胞兄求希庵回家一

面希庵不肖我告也林翼頗難處置林翼素不强人
蓋因禍福生死成敗利鈍皆有分定惟是都病多驕
鮑愼而愚唐疑而惑林翼左右又無可恃之員恐誤
鄂事耳

致錢萍石寶青樞密

漕折事仍照舊部中則通行各省意欲仿照江浙情
形不同尙須從輕江浙州縣痼疾太深亦恐非自今
長官所能鈐制且情形實未可強同二民先生之意
可感而實恐在外之官吏必不能仰體也異日如以
駱以滌辦江浙督撫之事均力能及此非欲遲也蓋

有待耳商賢之不免參差蓋不知民之情僞不知艱
難也卽令運河近年可通鄂中之米以銀購運亦儘
可辦到况近七八年運河不通耶卽令江岸肅清二
三年先辦海運則鄂中尤屬不難第辦此事亦預爲
十年後地步矣且籌緊要處已荷大力主持其閒筆
只合不理耳江浙不能不免米應大戶小戶一律免
米不準多收一粒免米之後應每石加免費雜費共一兩三
四錢爲度此一兩五錢之串如何提半以益國計如
何分存以利兌運則在大官之一手經理非一二年
不能妥辦也駱之辦事全在左卿然公忠之志亦近

年所獨也滌若任事則才力更大惟與俗不諧耳迪
庵 恩旨是我公燕許大手筆激揚忠烈生氣凜
然此公功勳甚大近年將帥無此忠良得公爲此

制詔死且不朽矣其謚法何字其碑文祭文昭忠
祠文之出翰林院者未知尙能沈著切題否敬乞覓
稿見示所擬水師兼習步軍各條附覽此系與各營
公商之件尙未定也遍地皆賊防不勝防非算定非
多算一二著不能成功又三路分兵苦無三路之將
迪旣云亡都又求退滌公必無渡江之理湖北之將
實不敷用恐所議者急切均不行也人便附呈鑒正

可見軍事之難而餉糈之不易尙其有以教之

致張仲遠觀察如冠九太守

前承惠拓本江南地圖感甚弟之志識豈堪及遠武
惠收圖籍於江南鄴侯得戶口於秦府古有其事今
非其才特鄂處東南實爲中原樞紐敬乞鈎摹江南
湖廣河南江西六省原本暫不求其開拓保此亦足
以豪矣其餘各省及拓本隨後再請寄示不過欲備
案頭之省覽豈堪周知天下之形勢耶

復昌營余會亭參戎

連米自外江入英山實非易易連日風雪漫山尙難

決定太湖潛山無力攻之。法攻城無良策。自昔已然。此時官軍逼太湖者萬四千人。多而無益。駐荆橋者五千人。在黃州者六千人耳。貴營在郝家橋。足資堵守。其在東河夾鋪之賊情形。若何深以爲念。陳德圍不嫌空虛。否。羅田足資堵禦。否。卽望示及。得二十八日之探稟。所慮極是。頗有條理。漫水河出流波。碰直達松子關一節。尤見思慮之密。應以黃州之六千人準備麻羅貴營及唐道各營。專顧蘄州。蘄水英山等處。如貴營力能自支。或賊知英山有備。不入蘄水。蘄州則唐道之行止。尙可再商。如兩蘄及貴營有警。則

二千人恐尙不足可以此函先行商之唐道相機策應至麻羅之事暫應責之於我儻異日兵力實在不敷則臨時調遣亦尙可行也仍望隨事隨時專探專稟盼切

致糧臺總局

天堂之事尙無動靜卽有動靜仍守前此辦法總是穩著中堂來信以戰爲守且戰且守乃是深謀遠慮天下事決無近功也王璞山之部百戰之餘其精銳不可當湘軍除迪庵一二營外以此爲最雄張凱章一軍不過三千人逼景德鎮而壘已損折五百人賊

數約七八萬勢必不支應保全此陣則江右乃得安枕滌帥乃得萬全鄂之南岸乃可兼顧是誠難事卹賞按月搭解力所不足希庵亦不强也可不必容心湖北月餉大虧乞速議節法儉約法入將之罪可由省中分別定擬弟無必殺之心若以殺人示威則仍是爲已之私也情罪的當得其平允可使死者復生而不愧生者知畏而知感則善矣再節儉之法如糧臺應辦雜物及年節送禮三五日內擬通飭各營一律停止總計不過每年少數萬串莫謂此爲小費小費不惜大費亦無可惜矣高以下基洪由纖起此之

調乎第一要事莫如裁營頭五百人一營每年須三萬五六千兩少一營卽節去三萬六千兩然兵之難裁以統將少耳使得統將則五千人可抵萬餘人不省之省其利乃大又滌帥乞奏察哈爾馬匹愚見添馬隊乃豫爲皖豫之計可於察哈爾調五百匹大凌河調一千匹或一千五百匹不由上駟院經手請中堂代奏又馬勇三千何人能統何人能分統且勇丁來去自由尤不易馭應請中堂定見仍 奏請西丹千名卽可抵三千馬勇之用且有舒公等可駕馭也

致羅澹村方伯

我輩心腸太直無一切作用亦不暇及此能開誠心
布公道者惟中堂一人弟亦質直而粗淺矣羅田空
虛之處來示撥新營二千人專爲防守羅麻其防麻
耶其防羅耶其一處一千人耶賊不入楚則已入楚
則必挾全力非三萬人必不敢來多或四萬人少亦
二萬人若如尊意則恐此二千人者適足以供賊餌
耳而於軍氣亦必微損軍額之在黃州者實不過六
千餘人豈堪再弱也哉且二千人無分領之統將則
謂之無一人可也連日得霍山英山余將伍令等探
報情形漸眞是太湖荆橋之如不欲戰非忘戰也賊

意固別有在矣第日夜之所思不患賊以二三萬人并一路并一路則力可倖勝若賊分爲二爲三則眩我心目搖我疆場以六千人分兩路均單且無分統之將其預爲思議有以益我來示清野是第一良策請試札之限之昔年民欲賊來不冒清野近年民不願賊來然尙不冒清野也欲清野尙待創深痛鉅之後如此時能行此則感激之至川中來咨已有三萬餘解鄂弟寄函秦蜀再四力懇懇請之詞不爲不切可請中堂再加一咨催言及月欠已鉅共百餘萬兩此後仍一月一咨似不必再奏酌之

致唐義渠觀察二則

前奉一函詢謀之事預爲異日上援地步弟思賊在
流波碰現到者固多竊恐尙不止此以賊不來則已
來則必以大股也荆橋陳德園均不可無兵荆橋尤
重而陳德園亦兄一二年精力之所布置棄之可惜
所商條列於後一以阿三千人與彭牧帶督守卡團
練可保陳德園無事否如此處以千人與團練可保
則尊處訓營與荆橋湘營均可抽調一尊處如移荆
橋則上游無警之日可與蔣合同防剿如上游有警
抽撥一軍則下游不虛而上游有備一弟處六千餘

人縱使二萬賊繞入羅麻弟亦同希庵力與之角特
患其分爲二枝三枝則我軍不能卽分無論六千餘
人分爲二處兵力均單卽强分之而統帶只希庵一
人亦難駕馭諸將也一尊營移荆橋三千餘人守或
有餘以上均乞速酌以備異日調遣應援

初四日探單均悉頃纔致書請示一切矣弟意太湖
石牌必無求戰之意

卽欲求戰亦須官軍力攻氣懈
之後此一定不移之故智也

弟意總欲以堅定不搖之營與賊久持賊懈然後乘
之而另備一萬精兵俟機進剿或援應上游上游果
能不失則剿退之後乘勢力取可得一二城也

致厲伯符觀察

所議節約各條有可酌行者有必不可行者遲再詳
悉奉復至協餉三萬酌減一萬一節此萬不可行之
事淞公忠義冠時斧柯未具專恃湘鄂之餉無論如
何虧欠此三萬者必不可絲毫欠缺至下游彭楊水
師每月可暫欠五六千金下游及黃州陸兵亦可十
分欠三均屬無礙又弟處黃三清一營希庵處彭炳
武之剛右營李贊勛之毅右營均已啟程可派員迎
催之彭炳武李贊勛到省軍器鍋帳銀錢等件乞速
付給飭令速來又戾連升帶來左公交付之劈山礮

三十尊亦乞速付糧臺以便支領松子關銅鑼關等處賊蹤漸逼麻城黃安尤關緊要而羅田其次也

致牙釐總局李香雪太守

兵事勉竭其愚或猶可爲已詳公函中矣餉事以釐金鹽課爲可大可久之謀然此二事在人不在法此番力請壽山回省欲與老兄細商分局人才預防中飽也所有應辦之事乞老兄直言無隱弟處本無絲毫飾徇之情聞善言見善行無不卽時遵奉者此情早在洞鑒之中又總局分局之根本必在寶善堂此須大著精神則財與才乃不竭公在鄂中可算明於

人倫好手莫自謙也惜相處仍未久而黃州又非公
可駐之地耳

復黃鶴汀太守

客冬辱頒輓章當已拜領奉函致謝惟承惠百金及
鐘表各件謹以奉璧以遭喪之後概未受賻不敢獨
領尊賜而頻年戎帳露處鐘表精細之物未可與戈
矛並列蓋不用此等物已十餘年矣林翼客冬臘八
馳往黃州行營蓋自三河敗潰元氣太傷軍事從新
整頓皖中羣盜如毛與鄂疆緊爲接壤岐途百出防
不勝防聞賊於石牌潛山修築僞城以爲負隅之計

內度軍情外審賊勢有勦法無堵法非分途進攻未
能得力惟添募收集之師鹽糧軍火殊形竭蹶計月
餉三十餘萬兩春夏六箇月月欠十餘萬兩秋冬六
箇月月欠八九萬兩竊恐民力已竭兵禍未已終貽
笑柄耳奈何奈何

復勝克齋

保欽使

皖省數年賊踞所在蹂躪羣黎之流離疾苦如苗稿
然若得時雨下降雖不能驟如從前之生氣而徐徐
漸有生機惟閣下濟變宏才救時蓋抱振虎貔之士
埽殘氛而祛妖祲大沛甘霖以蘇皖民無數百萬生

靈其造福豈僅一世哉鄂皖緊相接壤犬牙相錯防
不勝防林翼自客冬馳駐行營惟三河敗潰之後元
氣盡傷四年糾合之精銳覆於一旦而且敢戰之才
明達足智之士亦凋喪殆盡斯時收集舊卒添募新
營急迫成軍將領尙未得其選恐一二年不能得力
而鄂中鹽糧軍火接濟維艱月欠十萬兩內外錢漕
釐金入不償出且恐日復一日猶不免飢潰之憂此
則私心之所焦急萬狀者也太湖石牌羣盜如毛游
氛往來邊陲未嘗一日忘鄂且有分道并入之勢蓋
覬楚之健將無人欲以乘機侵軼也

復訓營唐觀察

接來函具悉築壘成橋俱臻完善而小湖河分營駐
守後路又可無虞深以爲慰天堂之賊聞逐漸南移
已偪近柳家畈地方意圖上犯尙祈偵探示之來示
不急攻勦賊來則戰洵是穩著又來示賊逼近營壘
堅守不動俟諸營抄出而首尾夾擊之尤爲萬全至
計地道攻城之策惜沙土難於支撐恐必不行也總
之防援賊不攻堅審地勢度賊情保全精銳一鼓成
功乃行軍之妙法也尙乞大才裁審之

復余參戎

接二十日並二十三日來函具悉分營駐紮扼要設防其地利情形惟足下可以就近審度軍事固不能遙揣也英山一路可繞羅田襲我軍之後來示謂英山萬可無慮甚爲忻慰深溝高壘刻日經營靜以待之整以禦之函中此四語頗得行軍要領率隊操演仍須派探丁前導整飭步伍以張軍威幸勿以賊蹤尙遠而散隊巡游也四營相距七里似尙嫌遠酌之

復甯鄉縣魏茂才

接澤來函藉諗閣下養望名山不欲輕於一試想見高賢自遠別有深情意者其鳥則擇木之說乎林翼

德性疏薄不能有補於時事特以流波旣頽正氣未
長扶持顛危必藉賢才况盜賊充斥之天下與叛藩
別國可以避地避世者不同如柴桑如廬山之虎溪
如桃花洞天往代隱士所恃爲奧區也今則盡爲盜
賊游行掉臂之地識時務者爲俊傑閣下卽有獨善
之志其能安然自處於堂室之奧耶早出一日卽可
早盡一日之心力惟望閣下卽日來鄂面談一切局
務軍務任其所擇幸勿金玉其音令我長懷白駒於
空谷也禱切盼切

復多禮堂

隆阿

都護

接奉惠函藉悉軍情平穩我兄忠勇冠軍長城倚重
私衷快慰如何可言來示預派馬隊以備撥援具見
公忠體 國規畫周詳尤爲欽感之至惟新到西丹
官兵本欲令其前同大隊操練膽識因上游馬隊太
少而六霍之賊乘虛漸逼恐各路分警不得不留爲
準備且數千里遠道迢迢未免征夫現瘁急令驟臨
前敵又加數百里之奔馳亦殊可念弟前函告將軍
謂應如何調遣之處均請隨時札飭仍候將軍節相
隨時酌調弟必無成見也

復均光營阿參戎

六霍之賊竄擾潁壽一帶貴營扼要立營如高加深
自是要著惟須約束兵丁不得滋擾又須不時操練
使步伐整齊技藝精熟庶戰守皆能有備耳

復揚厚庵載福軍門

軍情瞬息千變英霍出勦之議又待緩圖李鶴人官
亭失利十六日遇害太湖石牌兩路堅壘困我前軍
而鉅股漸逼固始窺我羅麻德黃各處此閒六千人
二月十二日移駐上巴河只能迎勦一路現已抽撥
唐道一軍移紮荆橋以備各路分警爲調蔣道回援
之計唐道守荆橋想亦可敷堵禦然非有實在警信

蔣道仍不卽調也湖南事勢甚緊賊眾號稱二三十萬十三日桂陽州又陷又來乞援弟將去冬所募二千人盡以畀之矣湖南請以王明山舊部戰船駛回長沙想已入照弟處已派蕭翰慶上援矣如賊入麻黃德安則恐須再調部下一營防府河襄河預言及此以備不虞

復楊厚庵軍門

王明山所部戰船想已派往湘中前經函告尊處他營暫可緩撥陳李二營可在下游聽湖南後信再爲酌量來示請須可率陸軍往援一節已派趙羊黃李

四營合二千一百人前往矣并籌馬隊二三百人尙未成行鄂力固不支而上游多事則鄂成腹背交困之勢且慮軍士聞警情切望鄉惟日內未得來信甚爲懸念耳六霍賊蹤尙無舉動聞有分擾定遠之說逆情想爲後路之計非忘楚也

復載益園將軍

接奉惠函以旂營餘兵月餉無項供支並詢從前生息本銀當經飭司查復并令稟商中堂致稽裁咨據云此項之銀原歸鹽商相權子母從前辦理已屬不敷月支會由藩庫閒款墊給十餘萬自咸豐二年鹽

務改引爲票兵發之後本利全無現在庫款支絀正
兵之餉尙無可措餘兵更無庸議來示隨餉撥解之
說近年旂營正餉尙虧何能更及餘丁本年東征之
餉月虧十萬兩以內亦不能更及坐營矣林翼再四
思維於三年後俟吳地肅清先行籌畫旂營正餉再
數年乃能恩及餘丁刻下無米爲炊徒喚奈何耳

復劉帥書

接奉惠函具見視事以來於地方風土民情悉心諮
訪甚慰鄙懷惟求治之意似有不爲火烈而爲水燄
者不知世變風移近來人心日趨於僞優容實以釀

患姑息非以明恩昔子太叔爲政不忍猛而寬所以
萑苻之閒羣盜蜂起殆其取而盡殺之而所害爲已
多矣居今日而圖治必以痛掃書差積弊爲先著除
莠安良爲申權至計而非用霹靂手段不能顯菩薩
心腸迨至息游惰而勸農桑興保甲而敦戚睦害馬
旣去伏魔不驚則法立知恩而良吏之後效也大抵
吾儒任事祇盡吾義分之所能爲以求衷諸理之至
是不必故拂乎人情而任勞任怨究無所容其瞻顧
之思固圉庇民胥於是乎在也因卽來函所及條列
於左搶劫之案刁風最不可長今日之搶犯卽異日

之亂民畏難姑容則積久釀成巨案如遇有不法兇徒肆行搶奪卽設法緝拏小事稟之該管府大事徑稟可以公商必須辣手示懲使知畏法則此風或幾乎息矣土地所以養民訟事不得牽連無辜差役不許在鄉滋擾使斯民各安本業得盡力於農事而山多田少之區必以雜糧爲生活其不宜五穀者諭令廣爲樹植使無隙地每於聽訟下鄉隨時董勸有游手無執業者重加儆飭庶人盡歸農而凶荒有備矣要犯謝開基從前兇惡逼人屢次札飭訪拏未能弋獲旣尙在隨棗邊界務須設法密捕不可孟浪不可

過於急性驚飛之鳥亦當回翔舊巢鬆一步以爲緊
著切勿再令驚竄遠颺至要至囑湖北錢漕積弊皆
由書差包抗需索日增煩重斷不可假手猾吏奸胥
致滋流病清戶杜嚴推收節節清釐層層鞭撻撫字
之與催科亦皆並行不悖使正供有缺軍餉何資蚩
蚩之氓尙須曉以大義無令陷於罪而不知也縣中
用項藉平餘爲開銷儉以養廉自宜節省冗費惟所
用人數太多轉覺難於稽察薦人之人不能分受賂
累何不可卻擇可用而用之不可用則去之此中正
無容多慮也以上各條皆直切可行之事惟賢宰實

力而舉行之

致舒輔廷

保都護

頃接中堂將軍來咨以湖南奏請此閒馬隊急需
派撥上援多禮堂現臨前敵未能抽調而上游事機
至緊大局攸關敬請麾下酌派馬隊二百名營總一
員迅速馳赴星沙相機策應聞湖南征兵二萬力頗
不單惟馬賊奔突步營難與爭鋒石逆大開最畏湖
北馬隊以魯家巷洪山之役石逆幾乎就擒也惟所
派營總尙須明練老成并乞鼎言諄囑使與湘中步
軍合力勦賊一心而成大功惟蓋抱權衡自無不斟

酌盡善也

致羅復亭司馬

皖中羣盜如毛逆氛時虞衝突本擬分路入勦適以
湖南上游不靖勉力應援尙俟湘患稍紓始能力圖
大舉刻下欲爲保楚謀吳之計囑伍令於近界要區
察看地勢修築關隘礮卡聞板廠龍井畝尙屬掄吭
而地屬珂鄉動眾興工必資熟手閣下爲一鄉之望
宣風展義不殊登高而呼令嗣亦落落長才儻得相
助爲理則人地素習呼應較靈固知小隱堂前不堪
煩擾而同仇敵愾猶奮老拳礮卡成而守禦旣得可

杜賊蹤窺伺近界各處亦利賴之敢請先生爲之道
地其一切布置之處仍乞與所派麻城各紳商辦

胡文忠公遺集卷六十二

長沙鄭敦謹

湘鄉曾國荃

編輯

致四川總督王雁汀前輩

己未二月初四日

前在益陽倚廬兩奉手諭感銜無似臘月初旬從戎黃州遇冰如於漢臯詢問鈞候至詳尤以爲慰楚省抽稅兩重實緣饘餼不給綜計宜沙兩局并有內銷外銷之欸其形之奏牘者皆內銷也其外銷亦隨案聲明均歸督轅主政毛公謂楚之應得者不但倍蜀殆并外銷言之也至督幕所繕季報自系幕中習氣

此件向不歸撫署會奏有事後補行者有并未會銜者撫不管鹽與越與晉與齊魯不同應候告之揆帥使於季報畱意總之楚人貪德已深楚軍之尙存皆老前輩在秦在晉在蜀之德臨臯亭下盡是岷山之潤澤豈忍倍本耶楚地吏才將才太少三河桐城之債事實亡五千人養生弔死撫舊募新頓益三十餘萬兩之費而按月之水陸接江接皖者又三十餘萬兩林翼臘月到鄂已虧九十萬近月將百餘萬兩矣到黃州月餘日極力振作外質如前而中情非昔則以人才殄瘁志氣不如昔年也軍士傷尙可完大將

亡不可贖其旣軍之謂乎念滌帥以忠義倡率近三
四年精銳殆盡如林翼等獨能自強耶春夏六箇月
餉敬求老前輩如數如期委解如林翼藉手而稍有
補救則昔年老前輩之垂念楚軍隆貺未墜前事可
完儻春夏六箇月之精力竟不能復振或竟無可成
則利鈍不可逆觀虛糜亦屬覲顏不復再以鄙言奉
瀆矣滌公一軍鄂濟三萬湘濟三萬以滌公本起義
於湘湘頗足用鄂人則入皖者二萬餘人水師入皖
與守湖口者又一萬餘人其駐黃州者六千人耳代
守湖口之陸師在外通計江皖援師代守之師與蘄

黃自守之師水陸馬步五萬餘人鄂力本不及而念
滌帥公忠力完楚疆何忍負之故亦勉効月餉三萬
自夏至秋自秋徂春未敢閒也聞湘鄂每月共協六
萬之外尙欠三萬奏乞蜀中二萬乞尊處按時協濟
遲一日則滌公多欠一日少一千滌公多欠一千也
近日守彭湖及應援景德鎮之師又系楚中派撥聞
賊以七八萬人圍繞滌公之所派張道一軍張道僅
二千五百人尙完亦可危矣萬不得已由鄂撥援非
鄂力之有餘寶江右之喫緊人每言楚人月費三十
餘萬爲舍田芸人爲甫田之務廣而荒爲微生高之

乞鄰與人林翼獨念禦侮必在境外若閉房閤以拒盜終無及矣鈞見以爲何如林翼負大罪而從戎因弛寇頻年安楚拯我於危聞難不赴負心於冥冥中且江皖援剿之軍又三四年糾合之餘亦不能棄置不顧才力與事勢明知其無補亦明知其必不能有所濟恐託詞避禍神鑒其隱惟事成猶不免罪不成則罪無可赦矣每念及此中心摧傷又鄂中軍事與餉事均乏人才與冰如商權奏乞鏡帆聽孫來助特恐其儉德辭榮德輝自悶殆爲鳥則擇木之意乎然求之頗堅或鑒其愚矣到黃州後又巡邊疆一次整理

新軍日夜少暇作復旣遲措詞亦苟姑盡此意尙乞
海宥

致余會亭

初六日

所答六條均有可採處陳德園已派彭牧守卡俟彭
牧有警或力贊不支再飭唐道回援亦甚直捷此時
尙可不必也切須告之唐道進退遷移必須十分審
慎近年州縣一聞警信動輒請兵各顧其私不顧大
局非審慎出之未有不爲州縣所誤者此意可告之
唐道爲要初四之稟則賊情趨往霍山一路也弟料
霍山之失自在意中特賊若入羅麻非二三萬人不

敢徑入若僅止數千人必不來也來亦必無足慮此
事我早料定如近日果有賊來麻城等處則六千人
亦可禦二萬三萬之賊若再分枝尙須斟酌耳

致唐義渠蔣之純兩觀察

初六日

太湖石牌之賊必不妄出賊之不妄出非忘戰也意
固別有所在耳弟處現有六千人如二三萬賊并作
一路來戰弟當力與之角未必不可決勝若分爲二
枝則我軍不能分以統將太少耳卽分矣而每處僅
三千餘人亦恐彼此均嫌不足萬一賊入羅麻弟意
此番必更繞去麻城之上蓋七年官軍攻黃梅而賊

乃乘虛以犯蘄州八年蘄州陳德園有訓昌義禮營則賊又乘虛以犯羅田麻城黃安今則必更繞上一層矣又賊不犯楚則已犯楚則彼亦自處於危非二三萬必不敢來來則必分枝傍擾以眩我心目驚我疆場六千人可戰而未必可分預先商酌以爲淮備是爲至要或曰賊如入境則調訓營上援是說也然歟又或曰賊如入境則請訓營由太湖移荆橋而以荆橋之全軍上援其說然歟又或曰異日警動則以余阿并力以捍兩蘄而以湘撫上勦以訓駐荆橋并調荆橋之馬隊上援然歟以上各說先此密商沈思

以窮其變博訪以求其益弟爲先事預防起見乞諒之

致官揆帥

初八日

前得手諭卽將原函奉交滌生矣因尊函未存座右遲久未復應復事宜開列於後一霍山之賊已入流波碰則商固麻城羅田黃安及德安漢陽已有漸次喫緊之勢擬卽移進上巴河探明賊所從入之處卽從警處迎勦惟六千餘人可當一路卽賊多亦尙不畏怯但恐賊分則我軍苦不能分耳一黃州一府形如圓甌黃梅宿松是一路蘄水是一路蘄州是一路

羅田一路麻城黃安一路六安與麻城連界卽繞出黃州之上再繞出太湖宿松之上五六百餘里與漢陽德安毘連矣若官軍併作一路則賊必乘虛而入乞請蕙生撰稿切實聲明地勢散漫情形必應以黃州爲重鎮乃能四路策應由尊處奏報弟今日奉

廷旨亦擬報明一次大約安慶廬州未復弟不敢離黃州應以黃州爲老營得尺則尺得寸則寸仍守老兄平日穩局之法不敢失也一弟到黃州以後將派之營已派往下游兵力已厚只恐異日分竄則弟力只能顧一路尙須調援耳一請吉林黑龍江西丹

千名

記七年八月都將軍齊有官員名單蒙中堂捐奏調未盡准行可否此次再於官員中揀調

馬二千匹

請大凌河馬一千匹均爲得法乞鈞意定

稿

能派玉農往挑得其精壯西丹乃妙西丹之富者能弓馬貧者亦與漢人等耳無錢無馬馬上仍

生疎酌之

一八將之罪請鈞意斟酌決無成見中堂是第

一仁厚德性林翼亦恐非能殺人者事經中堂酌定

必得其宜決不參差也一此次賊不來則已來則必

多一路則力可與之相角分爲二爲三則費手矣一

餉項大虧乞飭司道議節省之法以上縷縷均乞鈞

酌

致羅澹村

二月十一日

連得手書盡念彌篤連日分起拔營前駐上巴河林
翼非欲自戰也五六千人只能專打一路若林翼畱
守則至少又須分去千人非并力之法且希庵於臨
陣能審地勢於全局地勢向未領會或恐其百密一
疎賊若竄入必是大股又必分枝而來恐非另調一
將上援不可爲功蓋兵力不甚爭多寡四五千人亦可當一路亦
假如以五千人當萬五千之賊諒可制勝以五千人
分當兩二路之賊則須各有統將乃可無虞勝負之
數強弱之勢專賴此一人也前已咨商都公預爲准
備尙未見復林翼之愚亦必俟漸近乃決意征調先

事紛更恐人或謂之矣尊意以爲何如前撥湖口小
池口二營終必仍爲我用前此因滌公只有凱章二
千五百人是百戰之餘聞其失去一半因相隔十八里夜深救援
不恐滌帥誤事則江西必危江西危則鄂之南岸又
警豈鄂力之果堪代謀哉且以一千一百人挪去普
承堯六千人計無有奇於此者矣如果鄂警雪芹亦
必派回來助仍到黃州也至派往荊橋之周忠容應
隸蔣道本是蔣道老哨官也蕙公言前隊不過千餘
人偵探得確迅予迎勦亦是一計然亦必與楚境稍
近乃可行也賊速如鼠兵遲如牛此種情形殊難籌

策古人每言輕兵出奇制勝或再亂三四十一年當有此等人才近日之兵勇能穩固便是上等將領能布置審勢亦不多觀也昨沈思終夜發仁營會同副訓營先行馳入麻城嬰城固守付以米四百石火葯四千斤與之面約賊逼城下堅守十日官軍必到賊如入境無論多寡強弱不准接仗一意堅守賊不得城總易了辦此賊之技的是狐鼠也在野外作壘不憑城官軍必可制勝似此佈置麻城可保亦免得臨事驚疑鄉圍均無實際純盜虛聲卽如黃岡一縣并無一人團練惟前此葛致遠招遊勇及范潮關餘黨強

名爲團勇耳羅田稍好麻城黃安未必不可造就然
總是人才未能訪查確切耳蘄州之陳德園已有長
進餘皆虛聲耳何曾能戰弟兩次黃州若有意埋沒
士民之功勞心術實不可問然亦不便斥言以失其
望只冀其稍稍助聲威斷接濟加偵探便是非常之
功天下之大患總是書生不知兵之過總以兵事爲
小人之事非學者之事一遇警動則讀書人早已遠
走或隱匿不出以此觀之黃州那得有團練哉只剩
地方幾名惡痞作假充團長事後保舉則書差門丁
均首選耳下游抽撥不在兵而在將前已預咨矣咨

札已行糧台乞查之示之羅田請兵未便分撥自弱其勢此事若分兩路而來林翼與希庵當一路舒六兄與蔣當一路否則舒與林翼互易之或可盡力若三路而來恐他處不免小失然終必盡力謀之猶可爲也伍令初八日探報流波礮已有動機距松子關長嶺關約百三四十里萬山之中一線羊腸早已專人前往坐探一日一稟黃勝日十三日可到麻城湖南尚有二千人未到到日再行斟酌縷縷奉復

復李香雪 十一日

得示備悉邊事近日及半月一月之閒尙不足慮所

慮者曰後耳即日後尙不足深慮所慮者下游小統將不知兵畧而三路圖皖之謀未能卽得三人并須於三人之外另求一人替希庵思之未得我心彌苦矣希庵之義應謀皖以雪恥又應保楚然後能謀皖弟則鄂吏也不謀皖固難以保楚不保楚又奚以謀皖此心怛怛日夜不釋至麻羅之防尙有可謀倘再包出麻羅之外則鄙人之力亦窮而智亦短其隨營効力而不能畱黃州者則以獨畱黃州必須畱千人爲守兵分力單鄙人之意向以并力爲主不顧零星分撥致使一事無成此亦弟之深心矣釐局招引私

人其弊頗大弟用許多鄉人除周壽山一人以外宛無一人是咸豐四年以前認識之人卽曾少固邢星槎周笠西均是四年冬閒延訪而招致者分局之員未知此心亦并不能如弟之心無所倚應請札飭各局凡非總局及撫署所委札凡假託撫署所引薦者應分別去畱精意簡汰其私引子弟入局則直當懸之戒律矣又局事總以畱意江漢沿江沿河大局爲要天下之利必歸於水江淮河漢是也楚得其二所未得者淮南北盡心力于此二水之間復得人才之可信者注重于此則用力少而成功多外此僅枝葉

耳此時應專意察核于江漢近水之處切囑卹賞一節不能不勉應之第固知糧台艱而代領之不能盡無欺隱然領兵者不可與之言餉言餉者又不盡可與言兵所以難也黔之黎兆勳近日何如頗念之

致王鴈汀制府

十二日

前信甫發二日而手諭又至感仰奚言楚中近事兵非不多而苦于偏重一隅以五萬餘人分謀江皖而卜游尙以力少爲詞豈不可恥上游則終有應接不暇之勢此亦可慮近九年兵事之誤誤於官軍注重於前賊計轉襲其後官軍以仰攻挫銳賊計轉以餘

力乘虛也鄂之兵非不多總無一枝人馬置於活著
故機局總滯林翼謀餉不爲不力然月欠十餘萬兩
仍乞大力月有所濟并月乞鉛丸三萬斤是所至感
刻下六安霍山之賊由豫州之固始進發漸及楚疆
入楚固難然尙有人焦愁豫中則恐其束手耳郭建
汝等終爲楚蜀之患具見老成深慮嘗笑近年官吏
之識力如燕雀處堂煦煦相樂而不知盜賊已隱伺
其旁又匪徒到官漫不經意卽或懲處亦必一意姑
息勢必如吳老公之再呼荷荷而後卽安是可慨也
林翼移軍前進以期并力迎勦六千勇丁如遇鉅賊

萬餘或堪角力如賊分爲二爲三則尙不支耳軍書
倥偬百不及一附寄奏章均是實情尙乞鑒正

致總局分局 十三日

十二日得初十日蕙公書寄代撰揆帥奏稿詞義均
妥近人說事理總不分晰蕙公手筆切於事理惟沈
毅有識四字須告之同一省同一事不可互爲標榜
旣嫌其黨又嫌於淺也賊尙徘徊觀望已飭伍令移
駐商固之交設法偵探下游陳德國之捍蔽兩靳與
昌營之防勦英山捍蔽羅田東面者尤不緊要而太
湖之官軍與太湖城賊尙隔一河圍則不足攻則不

可頻以重兵如同虛糜究竟賊之是否上犯遲速多寡尙難逆知料其必先犯商固者不得商固則無米也賊到商固任其自然則我楚防不勝防而漢德二府均緊若以六七千人越境而謀賊內地亦恐空虛所以然者總是兵縱城下如奕棋之庸手不善著翻也實則兵多於張楊之時十倍多於武漢未復時幾二倍豈可再添兵以致同形饑潰乎久將請中堂定案林翼等無不遵依之理欲嚴者理也不能殺人者情也八將優劣尙煩另酌定案後交付差遣效力再俟秋閒酌量委用此時添兵實苦無餉無餉之患與

無兵同弟如喪家之狗如鬻桑之殍者屢年矣如八
將之勇敢者近日營中尙有此才又蕙公之示以璞
階不與希庵合路此却不可迪庵在日璞階頗受斥
責駕馭頗難其性亦頗浮動非獨當一路之才反復
思之必不可行又有一周寬世者新放總兵十三日
乃出圍尤爲奮勇希庵棄而未用林翼頗惜之希庵
言其營制頗虛僞有十餘人不足額又以驟貴氣盈欲折抑
之待半年一年乃可用或有深意耶容秋閒酌之商
城百姓紛紛遷移殆其警矣

致彭雪琴方伯

十四日

得初十日書意欲以普軍由彭澤入浮梁離鎮二十里爲景德之西路此計必不可行如果強之必致大誤凱章在東其兵將強健尙恐不能破滅此股兄之前爲此議者特以助凱章之聲威耳兄思普之膽氣軍情因人成事則有餘獨當一路則不足弟若期望太過必致僨事無疑一挫則彭湖皆動矣切須改計千囑萬囑若定期夾攻之說尤屬萬不可行東西相隔太遠軍情瞬息千變萬化萬一凱章勢不可戰而此間強之則誤凱章而使之輕進萬一凱章已進而欽堂乍退亦必使凱章轉無退路此尤兵家之所大

忌也至普鎮來信日糧欠五月本年以五六千人僅
領五千之餉似此情形廉潔之將亦難自馭其軍况
普軍耶前說應請速即稟商滌帥並函商江西省局
另行酌議切不可使普獨當一路則決無可疑矣切
囑切囑看來此事兄不過預擬及此因尊處言及景
德鎮危急也然總以滌帥之示爲定時凱章已站住
不必急也

致司道暨總局分局

十四日

迭次之探似漸真矣奉上一閱其六安一股似尙未
來此股欲入商固似系先鋒數不過萬餘昨夜已將

阿參將調守陳德園

并不緊惟是昔年布

唐道調

到荆橋淮備異日抽調耳調唐道則勉強可分二路

調蔣道則竟可合現在各營分爲三路約若陸楚當
可烹之入境則勦辦必速不入境亦須遣將往勦商
固光山均產米之地當可委員預往酌辦惟現在賊
尙徘徊卽令有警此現在之軍尙可支應可一面打
仗一面再調若賊未至而紛紛預調恐不甚安且恐
墮賊之詭計也賊探頗真黃州有一枝閒空之兵早
已知之矣惟州縣太無定力羅田麻城請兵請餉羅
田已將前繳之二千付去一千又新到桂勇二百人

已付羅田防松子關每月須七百餘兩亦聊厚不薄矣麻城則必可守十餘日但須諄囑守將賊來之時卽地方來報賊只二百亦不准出城蓋地方士庶無知兵道識之人去年大股乘閒李曙堂以五百人在城趙堯彰以三千五百人在兩路口地方官民催李曙堂出城出戰蓋言賊不過數百耳李曙堂傷百餘人而麻城卽日失守王震等轉運之員亦踉蹌去走是誤人而亦且自誤可怪也已昨已諄札黃副將堅守待援此城不失事總好辦私計料賊尙不目前吃緊或不卽來欲蠶食豫中有卷之地軍糧不虧乃能

思逞耳賊在河南地界必縱橫千里無人抵禦蓋欲求黃州之六千人亦不可得蓋合一省二省之營兵亦難調集六千人也時局如此豈不可危然則楚事尙可謀林翼必應竭愚慮以效芻蕘大約賊數在六安者約五六萬人暫時徘徊專爲糧米起見其必上竄則毫無可疑特其從入之處太多必須審料萬全耳然亦只有并勦之法無分防之法也

致羅澹村方伯 十五日

前商請補州縣一案仍請以擇人爲主另單二件並已存覽州縣佐雜踵接於道蓋以鄂爲肥美耶儻再

得一二年官滿於城民哭於野更恐官有餓卒矣反復思之竟無良策試思之博議之賊尙游魂乍前乍卻然黃州必應設三年之防少村學問近日有進境否弟欲設書局查兵事地理應在省耶抑于黃州設局耶黃州設局可以日月就將先有取益黃州只要有人布置永無可棄之理昔年楊公不守黃州其出兵廣濟之時未曾于黃州設守故也假令其時在黃州先設防則兵敗仍可復振迪庵尙有敗歿之事可見孔子之慎戰與臨事而懼乃至言也弟曾設儲材館不過爲更換分局委員起見後因其立名太顯改

爲寶善堂所費至少所益至大儻無此處則明知分局之有弊而無人可易應以此堂爲釐金根本應仍設省中耶抑改設黃州耶皖北不平江南必不能平不覩於晉與隋出師之路徑耶必以一枝出巴蜀以循江以一枝出廣陵一枝出和州一枝出廬州一枝出蘄州一枝出襄陽皆古今形勢之自然也縷縷奉布卽希鑒之

致左季丈

十六日

十五日得初九日書知南路又警我本急求印渠及其部下之將而服嶺之防又奪之使南何統將之才

之少也軍中無智勇之統將則萬人二萬人亦終歸於敗無論彭劉勇力太單不能禦賊即使再益數千人若智畧短淺亦終必敗矣湘中亦尙乏才何況他省李雨蒼志在北路林翼亦欲用之於北門可以二月啟程爲妙凱章能否支撐尙未定也賊數太多兵力太單耳凱章知稟畱吳翔岡頗見器識人才因磨練而成總須志氣勝人乃有長進成敗原難逆觀不足以待人才趙陶之餉已設法補苴鄂中自羅李募兵均以到鄂之日起支昨因此事頗費周章然亦不能盡如所欲例外申縮林翼已飭司事者妥爲照應

矣籌餉固較易帶兵較難惟以衰經出山不司兵事則此身何以自處萬世之清議其不足畏耶至公謂帶兵非所長固然然萬事可謙兵事不可謙太謙則怯太謙亦近僞況目今十八省之上座者尙以不肖爲最能兵耶此二年之中應在黃州兼司餉事決不能安坐堂皇如尋常服官模樣老妻病狀丈前已見之心恐其病久而成癰欲乞仲遠爲醫而亦格於義分不能如願此出爲不得已之變局受印不過爲餉事耳餉之誤人若此默計欲丈莫出山而恐不能更恐遲而後出山又難措手又恐所託非其地終必受

困丈冒謀湘以保湘丈去湘湘豈憶及前事遵守前
法以益丈耶此時南路告急固不必深談爲丈深思
固有良策惟滌公則謂湘中必不可無公噶不可搖
動當以湘鄂爲天下之根本其說然與太史公作屈
原賈誼傳提王明受福爲論又其作孟子列傳專提
利欲中人立論此其特識固應千古不朽皖邊頓兵
數萬卽一二年亦必無尺寸之功不能三路進兵又
不能有三路之將奈何 廷旨欲林翼入皖已言
其不可然數月之後終必再及以 中朝本無定見
隨外間之議論爲轉移也表之內召乃因勝保劾去

胡文忠公集卷之二十一
袁不足深惜勝劾袁亦不足深怪但袁在尙不能支
劾袁而袁得所勝不自求才而劾人如鬥者自砍其
指豈非大愚也乎袁公畢竟忠心亦殊不可多得六
安破後狗尙徘徊黃州有兵賊固偵探而知之矣手
此奉復

致左季丈

二十二日

廿夜聞警肅復一函水師必以健捷二營速回湘中
趙福元是大可造就之人才能不調回固妙如必不
得已則林翼亦湘人也馬隊百名萬不濟事至少亦
須三百人已函商揆帥與都公恐不我予也驍騎校

十人來湘教習則實無用處卽迪部二百人教之三年然弓箭馬鎗仍無實力南不善騎北不善舟天機之也此時大計應以扼險自固堅壁養銳伺釁再動三月兵力可集再堅持二三十日固齎堅忍乃可用也若以新到之營乍爲嘗試則萬人亦不過數次敗仗而已矣乞公速取唐秦王之禦劉武周宋金剛薛仁果宗羅睺之法開具始末告之峴莊卽渠非厚集其力慎養其鋒不可破此鉅賊也又此賊以中下之兵接仗而中權後勁伏於陣尾輕而不整勇而無剛者遇之必敗此亦可預告峴莊也又永州鎮總兵周

寬世頗勇敢十月十三日夜半出國其時主將已亡
三日矣非戰之罪亦非不能守也可招致之其才亦
不過五百人耳若江西則必以八千人萬人與之普
士尙統三萬人而楚中如此不可入千人乎安徽鄭魁
人才均僅以五百人付之長沙之城必可無虞攸
縣茶陵乃賊所注重蓋必騎交界之山脊以爲可東
可西之計亦深知官軍於交界處所戰守不能自主
防勦均不得勢故也計此賊必害湘中半年總之軍
事必有所忍乃能有所成地方必有所舍乃能有所
全公早知其深微矣

復都直夫將軍

二十四日

得示敬悉一切湖南賊勢頗熾號稱二十萬郴桂一帶民俗强悍甲於他省從亂者必多力鬥者尤多聞十三日又連陷桂陽州等處矣馬隊二百本嫌其單况必須有智勇知兵之將乃可不誤事機兵隨將轉俗諺良有深意此次如蒙與禮堂商撥必乞以可靠之營總前往否則恐損國威而無實濟湖南奏請勅下將軍以二百馬隊赴援并請中朝速撥馬隊二百以補其闕弟意此次賊匪馬匹亦多若僅止二百人非知兵之良將不能萬全也湖南步兵尙有强者若調度齊全厚集其力而堅忍自持當可得

力也總求老兄費心昨日樞中來信言天津有黑龍
江馬隊若預先以函懇求僧耶異日撤防之時以一
千馬隊撥入湖北實爲便當僧耶心憂天下當無不
允行者弟擬請揆帥預 奏并求老兄賜寄一函代
陳一切弟不敢與親王通書信也今日鍾榮煥稟到
弟頗怪之據云并非推諉願先到省辦出藥料伺候
將軍弟詢其脉症據云心疾甚於足疾若不安心調
理僅照俗醫腳痛醫腳或恐貽誤糧台司道已稟中
堂在省城安設公館省城醫藥甚復弟意仍請老兄
回省如以爲可弟卽飭瞿定國來迎仍以水路爲便

黃梅一切不便弟心歉然之至

致會滌丈 二十七日

二月廿七日奉二月十五日五號信敬聆一切水師兼步前以說帖寄厚庵雪芹均言難行尊示當先求人而後立法求人以統領爲難尤爲體要厚庵久病岌岌難支雪芹血性過人陸戰尙非所習李與吾陳金鰲連年亦患血證此皆四年以前精悍之士積勞而疲殆非朝氣矣劉國斌尙未接談有李朝斌者似有英氣刻因石逆由南安陷宜章興甯桂陽縣桂陽州等處湖南調王明山統水師湖北以蕭翰慶一營

繼援急切尙難改議且巢湖舊時船砲近又新添水師仍未可單也異日或能另謀陸路統將則以鮑春霆之陸兵由舟入江自與水師通氣惟春霆酷好攻堅頗有固執不化之概貴戰賤謀雖裨將之雄仍恐不足以當一路耳官帥奏捐馬并奏西丹十日內可得旨此閒已委定記名副都統巴揚阿前往辦理并攜銀二萬解部前奏定呈覽矣若西丹不得力中樞來信囑預致僧邸于天津撤防時酌撥黑龍江兵丁千名來楚官與都可寄信於僧邸林翼與丈似可預函寄知筠仙也采買馬匹北口爲多七月以後

盈望成羣若到河南陝西零星收買不如徑行出口
爲合算俟昨奏

批回卽有定章矣田興恕已復

占州昨經湖南奏派南路統兵普承堯等爲建德所
牽蕭濬川又爲湖南調去湖南卽令強支而郴桂窮
民經石逆此番脅制入賊者必多恐鄂與豫章均肝
食矣水師抽半改陸尊示以一舟之中有改陸有不
改陸有加餉有不加餉勢必窒礙難行軍事最忌參
差最嫌紛擾尊見是矣六安霍山均失守鄂與皖之
路盡阻李鶴人十六日遇害於官亭其潰勇已過麻
城粵逆窺及定遠一帶勝帥以招降爲得計蓋亦今

之熊文燦矣恐近月翁祖庚力必不支湖南乞馬隊
二百人官欲應之而多不肖卽勉強應命亦是怯將
弱兵恐徒損國威耳馬隊將領在鄂者惟多與舒
能戰另有一平海已回旗矣因瘡疾服輕粉中毒左足短二寸此外
亦少良將其在勝帥德帥營中者兵多於鄂不啻五
倍然頗有爲賊所圍擒爲賊教戰者將不得人無法
可施三河桐城卹賞未發足三月以後未免稍欠秋
冬之間仍可彌補如湖南不致大亂則餉糈仍可敷
衍糧臺固不可歉亦不可豐豐則官場之侈心又萌
矣財用如人身之氣血周行肢體有疾如癰疽瘡疥

之類病在一肢一脛而周身之血脉皆阻故頗望鄰境之安教馬隊戰法似以黑龍江人爲宜馬隊以衝突爲奇尤以善退爲奇馬隊如水師必有前有卻乃爲妙用湘營馬隊能進不能退退則羣然色駭不復再能歸伍矣

致袁午橋 三月初一日

三接手告感念何深以整飭殘兵尙遲函復而公歸京國不畱信宿則禍在淮徐不可思議讒人之愛公亦可謂私德矣如 國計何中懷憂悶井喋不食使人心惻此閒新失良將卽竭力圖謀非二年不能有

成欲入皖而虞餉竭欲保境而又虞將少不肖才力庸有濟乎熊文燦一意招降此非賊降乃降於賊耳而又美其名曰賊降大抵招降之手段惟漢光武唐太宗之時之將帥能之下至宋世宗汝霖輩已不免竭蹶矣此豈近今之人所可妄行哉

復皖撫翁祖庚

正月二月連得三次手告並公牘奏稿感頌德言尙是私誼之纏綿而窺測忠藎冠越朝右固一世無兩愛國心丹憂民髮白讀疏奏一再遍不覺淚潄潄下也因巡邊設防匆遽多疎遲至兼旬尙未裁復歉

愧萬分林翼去冬到黃州其時楚軍已扼定宿松邊防已固賊勢已挫其力戰之功則都將軍與多副都統鮑鎮軍之功也林翼十一月尙在益陽途次不可掠人之美貪天以爲己力都將軍在宿松患病林翼歲杪自往訪之旋回黃州所駐勇丁八千人皆三河桐城瘡痍之餘擇其精實完固者續撥二千餘人正月初旬前往太湖計賴兵太湖城下與分布荆橋分布英山之馬步已二萬餘人賊已憑城設守仰攻不可必非歲月之間所能奏功水師之在安慶城下及彭澤湖口之交者又一萬餘人陸軍爲城壘所遏水

師亦無著手處虛糜尙是近患英華坐竭壯志暗銷
一二良將積勞成疴而繼起無人乃遠憂矣黃州六
千人以麻城商固時有邊患未可并力一隅致兵勢
偏注于下蓋近九年以來官軍以仰攻挫銳賊計以
餘力乘虛官軍注重於前賊計轉襲其後此固非賊
之強於官軍特其機勢未熟不如賊之運掉自如也
况黃州六千人自應暫留作鎮如秋闕能分兵三路
分途進剿則征皖之志或可稍申然三路之兵尙易
籌謀三路之將尙未盡集有劉道長侑及其部下之
良將李明惠江忠義劉坤一已迭次函招夏闕來鄂

秋初可入皖而石達開連陷郴桂七八州縣劉印渠等爲湘中所畱計不諧矣至林翼之身兼籌餉精必不能親入皖地只能於黃州營中駐守蓋二三年之內尙不能離黃州也石達開糾合福建連城江西南安廣東連州廣西賀縣羣盜入郴桂號稱六十萬人實數亦不下二十萬湘南之力必不能支來此乞師已分水師三營陸師二千一百人前往仍恐無濟湘省不能力遏此賊則鄂省腹背受敵長江之險恐爲賊所奪而踞我上游矣默察賊勢自連鎮高唐河北肅清之後氣燄稍衰息自五年冬石逆從義甯入江

西與粵東之匪二三萬合併而賊勢復張白午橋初次罷官張樂刑倡亂而皖北之賊勢又張而時俗尙以某省肅清某省克復鋪張揚厲以入 告以之

釋 九重宵旰之憂則可耳豈謀國之至計與疆場之實情哉在朝在野般樂如昔侈泰有加此與燕雀母子煦煦自樂何異又與溺人必笑何異哉鄂餉月須三十五六萬林翼力籌此事不過月得二十餘萬兩尙欠十餘萬兩林翼離此地則二十餘萬兩亦恐減色此鄂中籌餉之難也廼庵殉難以後人才銷歇殄瘁之狀不可思議雖復加意延攬百方整飭而

胚胎規範彷彿如前筋骨殆遜於昔此又兵事之難也賊如閒道襲麻城以撓楚林翼尙思極力抵禦所患者分爲二三路必顧此失彼又恐其與石逆密約俟石逆從湘之南境漸犯入鄂而後陳逆等再圖由皖入楚也又近日頗以定遠空虛爲憂其江浦已得亦賊勢所必爭也招降之事才大力量大乃可行之如漢建武之時唐太宗之力則指揮自如羣雄聽命於上則羣奸自歛手於下下此則宗汝霖之畱守汴京偶一行之然已萬分喫力非汝霖得意之筆也鶴人好引匪人其將如袁懷忠廬又雄驕怯失律恐須

按以軍法否則終爲大患公所處之境萬難林翼自
問五六年閒所處之境爲軍興以來所未有之奇然
自得迪庵而兵乃強得厚庵而水道已通以林翼擬
公公之艱鉅殆百倍於人且其時林翼能使湘中之
鄉里士民均來助我公之鄉人何能入皖耶曾以公
書與仲遠立庵公閱

周立庵君子也特有守不
必有爲幹事之才稍短

均嘆

念不置然而德輔莫助友誼終虛刻下黃州之兵力
又少二千而石逆之擾湘南者警報日三四至楚其
旰食今日乃驗如湘南能破石逆劉印渠及其三賢
將來鄂林翼必以三路分兵入皖而自駐黃州竭力

謀餉以贍之此志未知秋閒能如願否

致彭雪琴

初六日

傑人陣亡誤於預先要約之一事近年陸營情弊甚大非仁義忠信如塔公羅公李公萬不可約會只可各量其力而已矣刻下總以守定彭澤湖口爲是如彭澤難守則湖口尤不可失當以死力爭之黃澤遠應調入湖口矣劉傑人之軍應以李寶賢爲賢可代管之畱千五百人足矣

復川督王雁汀

三月初九日

鄂軍之接濟屢荷大君子厚德恤鄰隆施未墜而前

此復以鉛丸火藥欲借東壁餘光實以征皖之師水陸並進約共五萬餘人又因石逆達開近由江西竄擾湖南連陷郴桂等處七八州縣此聞復分兵上援均資協濟此項需用愈繁鄂省愈形缺乏雖隨時製造終難濟十分之二三現當分途攻勦之際軍火所需萬分緊急本省既無從措辦又不能遷延時日致誤軍機全賴鄰省曲爲體恤按時接濟庶不使行間戰士有徒張空拳之歎貴省自軍興以來頻年解撥籌辦固屬艱難然究屬完善之區出產之地採買製備較楚省尙屬便宜伏冀俯念時艱如數辦就飛解

來鄂以濟軍需此係大局所關非僅爲楚北起見竊
不嫌其再三之相瀆也

復褚教職 初九日

前以一紙書爲介紹欲求相助爲涇江干盼望僅得
魚函而星駕未來轉增渴想猶幸惠然肯來不我終
拒此閒軍務倥傯任仗需才非得天下賢豪不足以
挽狂瀾而蘇民困故相需甚殷而相求不得不迫敬
乞吾兄將經手事件作速清釐即日束裝來營相與
商榷時事籌畫機宜庶集思廣益或可於時艱有濟
也謹掃榻以俟高賢如飢如渴不盡拳拳

復伍茨孫

三月十三日

初十日探稟均悉定遠已專人往探矣我軍念楚邊之尙虛未能分道速進實爲可愧力有不足非心之或忍也且湖南之賊已緊逼永郴豫州之賊一陷睢陽一擾南陽建德之賊又將窺彭湖失我劉守騰鶴吾楚爲四爭之地楚其肝食今日乃驗矣聞豫中邱鎮陣亡河南在此請兵已奉 廷旨矣楚力不能遠及遷地爲良楚材亦實難四路兼顧昨已分步營二千一百人馬隊二百水師二營援湘湘居上游唇齒之患尤切也閱書并雲鴻曉亭公函事理明白形

勢了然板橋既爲七八路歸束之處實可爲楚豫皖
出入總路閱圖考說欣慰無似至於費用一節毫無
足慮試問吾民自二三年以至今日所失於盜賊者
何限所費於詐索者又何限卽如蔡同知開坊曾因
被人控爲通賊勒捐十萬實固不值虛亦不值凡人
莫求人所謂求已者卽君子之巾要自立要自強要求已而
立不倚也卽君子之自強不息也黃緣再四已繳二
萬串又另繳三千串而前此之二萬串尙付之流水
也豈不可惜處此時勢四面皆烽煙所在皆荆棘惟
有努力自衛尙是中策居今日而求多財以自豐譬
如燕雀處堂母子煦煦相樂而不知禍機已發也爲

盜賊積蓄拱手奉之而尙不識其姓名彼亦并不道謝豈不愚哉鄙人在楚官吏尙不至十分貪詐以供應出差之錢爲百姓保身家足矣又何經費之足慮哉且此等事是藉地利以省費愚人難於慮始易於圖成願雲鴻曉亭大聲疾呼不日成之鄙人今日之率作興事人頗嫌之至二三年之後思鄙人之言與其日夜孳孳之苦心當有含泣而思念不置者矣

復李雨蒼

十三日

來示備悉石逆騎嶺脊而窺虛實得勢則恐遲失利亦思竄也豫州之捻四起來此請三千兵

廷諭允

之而實無可籌撥吳翔岡曾致書招之而所致之書
未知到否大致謂兵可挫氣不可挫氣可偶挫而志
終不可挫左公必致回湘我亦不便爭也鄢君之深
微處尙未晤談難以臆斷大抵兵事另有一種人物
文而近史武而近俠皆非能兵者湘旣日亟貴營赴
鄂之期未忍遽催視大局如秦越人之肥瘠豈不肖
所能出諸口耶所示撫湘不可稍有輕重足見心力
特不知意念所注疑是何輕何重耶尙乞詳悉示及
以證異地之心

胡文忠公遺集卷六十二終